



## AWEMainta ta presenta contestanan di e partidonan politico

**DEN** preparacion pa eleccion, AWEMainta ta dedica su mes na informa lectornan debidamente tocante e plan y vision di partidonan politico. Den cuadro di e Guia Electoral 2024, AWEMainta algun siman pasa a manda 15 pregunta critico pa tur partido tocante temanan esencial, manera maneho financiero, transparencia, cuido medico, enseñansa y husticia social. Lamentablemente, solamente tres partido, MAS, ACCION 21 y FUTURO, a reacciona.

E siman aki nos ta comparti e contestanan di e partidonan aki, basa riba nan programanan di partido y visionnan. Nan reaccionnan ta ofrece comprendemento valioso den con nan kier atende asuntonan importante, manera combatimento di corrupcion, maneho financiero responsabel y progreso social.

Door di considera e contestanan aki cuidadosamente, nos ta spera di yuda nos lectornan haci escogencianan bon informa na momento di eleccion y p'e futuro di Aruba. Ban descubri kico MAS, ACCION 21 y FUTURO tin di ofrece!

### Beneficianan social y cuido di hende grandi

- **ACCION21:** Nan ta enfoca riba aumento di pensioen y garantisa cuido medico pagabel. Nan ta propone reformatonnan den e estructura di belasting, incluyendo eliminacion di inkomstenbelasting, pa alivia e presion financiero riba nos grandinan. Ademas, nan kier inverti den cuido medico cu 112 miyon florin extra y otro servicionan social.
- **MAS:** Nan ta enfoca riba reduci tarifanan di awa y coriente pa hende grandi cu entrada limita y cobertura completo di gastonan di remedi door di AZV. Nan kier inverti den cuido di calidad den institutonan pa hende grandi cu infraestructura mehora y personal miho capacita. Tambe nan ta boga pa inclui cuido psicologico den e pakete basico di AZV.
- **FUTURO:** Futuro ta enfatisa cuido accesibel y di alta calidad pa nos grandinan y reduccion di pobresa. Nan vision ta inclui crea programanan di bienestar social inclusivo, mehora infraestructura den centronan di cuido y fomenta inclusion social a traves di actividadnan y sosten financiero manera aumento den e 'onderstand' pa nos grandinan.

### Infraestructura y energia sostenibel

- **ACCION21:** Nan ta enfoca riba digitalisacion y modernisacion

di infraestructura pa mehora eficiencia y combati desperdicio. Nan kier inverti den transporte publico y fuentenan di energia sostenibel pa reduci dependencia riba combustibel fosil. Tambe nan ta propone automatiza procesonan gubernamental.

- **MAS:** Nan ta accentua e necesidad di legislacion y inversi-onnan den energia renobabel y tecnologianan ecologico. Nan kier balansa crecemento economico cu conservacion di medio ambiente y proteha e naturalesa unico di Aruba pa futuro generacionnan.
- **FUTURO:** Futuro ta boga pa un transicion pa fuentenan di energia renobabel manera solar y biento, reduciendo dependencia riba combustibel fosil. Nan ta planea pa integra tecnologia eficiente den uzo di energia y descentralisa produccion di energia mientras ta proteha e herencia natural di Aruba.

### Recuperacion di medio ambiente y saneamento di San Nicolas

- **ACCION21:** Nan ta subraya e importancia di transparencia y participacion di comunidad den e procesonan di saneamento. Nan ta propone un mecanismo di control fuerte, sosteni pa un auditoria independiente, pa garantiza cu e proceso ta husto y efectivo. Ademas, nan kier organisa reunionnan publico pa colecta input di comunidad.
- **MAS:** Nan ta enfoca riba proteccion di medio ambiente y desaroyo sostenibel na San Nicolas. Nan ta propone introduci reglanan estricto di medio ambiente y colabora cu e comunidad pa restaura e naturalesa y crea oportunidadnan economico door di implementa tecnologianan ecologico.
- **FUTURO:** Nan iniciativa "San Nicolas pa Tur" ta enfoca riba converti e area den un centro pa revitalisacion cultural y economico. Nan ta propone pa transforma sitionan industrial bandona den espacionan vibrante p'e comunidad, poniendo enfasis riba practicanan ecologico y promoviendo industrianan creativo.

Cada partido politico ta presenta ideanan valioso p'e futuro di Aruba. ACCION21 ta enfatisa eficiencia y modernisacion, mientras cu MAS ta enfoca riba sostenibilidad y inclusion social. FUTURO ta trece un perspectiva holistico cu ta combina practicanan innovativo di sostenibilidad, politicanan social husto y esfuersonan strategico di revitalisacion.